



FASNACHT 2013

Echo vom Gämsbärg

QR:F:EvG:2013/Carneval Virtual

O haili Wält, du digitali
Vernetzt vo Buggte bis uff Bali
Wo'd s Smartphone scho am Morge frie
Zerscht wegge duesch, s goot ooni nie
Als letschts aastarsch in stiller Nacht
Wenn s gliebte Grät ainsam no wacht
Wo segglisch, wenn s di rieht, ratzfatz
Wo stryichle duesch, wie kuum dy Schatz
Wo fieterisch, wenn s pyypst albott
Mit Waiss d Gugger was, vyyl Schrott.
Duesch s Smartie dāwääg hääge, pflääge
Isch s dir dr bescht Frind, woore Säage
Devoote Diener und e Gschpänli
Wo – eb im Drämmli, Luftsailbähnli –
Dir jeedi Seensucht on-line stillt
Dir jeede Wunsch in-time erfüllt.

Begääre duets zerscht clever wegge
Hilft dyni dunggli Driib z entdegge
Het denn fir jede Furz badänt
Wie dr Kaländer im Advänt
E bassend Diirli (neidytsch App).
Säll App fiert di per Touch, faarsch ab
Ze on-line-Wälte, wo de rasch
Dryy flichte, di verliere kasch.
Stinggt dr d Familie, bisch ellai
Wird aim dr Cyberspace s Dehai
En App, e Click, so logsch di yy
In d Cyberworld Community
Findsch dausig virtuelli Frinde
Wenn ächti kuum no wurdisch finde.
Und sott e «friend» dir nimme basse
Kasch en per log-out aifach schasse
Oder de legsch en halt, ganz fyys,
Per «Pause»-Taschte cool uff Yys.
Bi Gsellschaftsspiil isch s Phone e Gwinn
S goot ooni Partner/Partnerin
Per App glopfsch on-line flott e Jass
Mit Anonyme – das miech Spass
Und wirdsch, das isch doch braggtisch draa,
Wenn Saich spiilsch nie en Aaschiss haa.
Dangg Smartphone isch, egal wo d bisch
S Dehai derbyy samt Byyroadisch
Luegsch d Fotteli vom Himalaya
In Pattaya oder z Hawai aa
Und setzisch z Miami am Strand
Zig UBS-Millione – Click! – in Sand.
Au mängi bsorgti Mueter zelli
Uffs Grät als Nabelschnuer, als virtuelli
Wenn si um iire Goof als bangt
Per Phone brieft, wo dä umme hangt
Und on-line s Kid, wo säll nit tscheggt
In digitale Fessle legt.

En App, e Touch, mee bruuchsch au nit,
Wenn Second Lifes hit lääbe witt
S isch s Netz e Wärggstatt, starggs Magnet
Fir d Wünsch-dir-was'–Ydentiteet.
Sott s aige Ych äggscht nimme gniege
Kasch s zwait, e dritts dir aanebiege
Statt em Brofyyl wo hesch, däm stiere
Massgschnyyderet e neis kreiere
Und derbyy on-line, das isch s Tolle
Vo Lääbe schnäll ze Lääbe scrolle.
Baschtlich en Avatar, dasch s Grescht
En aagsaits Ego wär do s Bescht
E digital vereedlets Wääse
Jung, sexy, gscheit – bref: usserlääse.
S wird s Jessie, Slim'-Software sei dangg
Zem Supermodel, gertesclangg
Ka, ooni ass si Botox spritzt
S Face lifte, glette, bis es sitzt
Dr Body style, modelliere
Ganz ooni Scheenhait-Ops z riskiere.
Dr Sven – verglemmt, schyych und schlächt druff
–
Tuned sich per Click zem «Bachelor» uff
Mit Sixpack ,Glotz und Musggle, digge
Wo d Tussies gyyrig drum dien zigge
E Frauedraum, en Ideal
«Se non e vero»... halt digital.
So wirdsch (was demokratisch isch)
Au wenn nur e Nobody bisch
Als Avatar zem Superstar
Dasch voll gail und doch wunderbar!

Au uns het d on-line Wält verloggt
Mer hän ys drum in Cyber gwogt
Und biete dir, kasch s gratis haa
E virtuelli Fasnacht aa.
Zyylsch mit dym smarte Apparatli
Uff so e schwarzwyss gfläggt's Quadrätli
Scan, click und gniess ys (nit verbasse!)
Jetzt virtuell – statt in de Gasse.
Erläbsch dangg Phone dr Morgestraich
Im Näscht, uffstoo wär biirewaich
Kai Druggete, kai Räpplistaub
Vo Pfyfer nimme d Oore daub.
Fir s Second Life at Carneval
Machsches alles nur no digital
Kasch s Goschdym easy on-line naaie
Baggsch digital dy Ziibelewaaie
Moolsch d Lambbe – s syg no «problem» nämli –
Am Laptop mit em Paint-Programmli
Dr Zeedel wird, per Software gryymt,
Nimm druggt, sondern in Cyber beamt
Fyylsch di als Clique glai und z gring
Bloosisch di on-line uff, s goot ring
Wottsch aimool mit dym Sound brilliere
Kasch dä no digital poliere.
Au Fasnacht mache kasch, wirdsch s gsee
Virtuell, und dāmnäggscht in 3 D.

Doch Halt und Hand aufs Fasnachtsherz
Es wär doch nur e schlächte Scherz
Gubts s Echo nur no digital
Statt säll vom Gämsbärg bis ins Tal
S weggt d Cyberwält, die Illusioon,
Kai Fasnachtsfieber, Emotioon
Well dert, wo me grad on-line isch
Im woore Lääbe gar nie bisch
S isch miede Abklatsch nur, e schlächte
Vo dām was Fasnacht isch, vom Ächte
S macht s Echo kimpftig – seg's wie's well –
«Fasnacht real».... nimm virtuell.